

Phaltā-Phūltā Īmān



phaltā-phūltā īmān

Faith that Flourishes

by Bakhtullah

[Ao, Khud Dekh Lo 9]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a modified image of
iessephoto <https://pixabay.com/illustrations/wheat-ears-nature-mature-dawn-3781755/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Siyāsī Yā Rūhānī Īmān?	1
Kachche Īmān kā Bij	3
Īmān ke Bīj se Nāzuk Paudhā	5
Īmān kī Āzmāish	6
Īmān kā Phal	8
Injīl, Yūhannā 4:43-54	9

Īsā Masīh Sāmariyon̄ ke ilāqe se hokar dubārā Galīl meñ pahuñch gayā. Sāmari Yahūdiyon̄ ke dushman the. To bhī rāste meñ kaī ek Sāmari us par imān lāe the.

Siyāsī Yā Rūhānī Īmān?

Use dekhkar Galīlī khush hue.

► *Kyon̄ khush hue?*

Bahut-sāre log Fasah kī Īd manāne Yarūshalam gae the. Wahāñ unhoñ ne us ke azīm kām aur bāteñ dekh lī thīñ. Unhoñ ne baṛe josh se use khushāmdīd kahā.

Magar Īsā Masīh ne un ke josh se dhokā na khāyā. Wuh to khūb jāntā thā ki nabī kī us ke apne watan meñ izzat nahīñ hotī. Maqāmī

logon̄ kā josh jald hī ṭhandā paṛ jāegā. Jald hī un kī ḡhushī kāfūr ho jāegī.

► *Kyon̄?*

Islie ki wuh us par īmān nahīn rakhte the. Wuh sirf apnā kām us se karwānā chāhte the. Un kā maqsad rūhānī nahīn thī balki siyāsī.

► *To phir Īsā Masīh logon̄ meñ kyā dekhnā chāhtā thā? Kyā yih ki wuh use pīr bābā mān leñ?*

Hargiz nahīn!

► *To phir wuh kyā chāhtā thā?*

Wuh chāhtā thā ki wuh us par īmān lāeñ.

► *Us par īmān lāne kā kyā matlab thā?*

Yih ki wuh mān leñ ki Īsā Masīh merā Ḳhudāwand hai. Wuh mujhe najāt de saktā hai. Wuh mere gunāhoñ ko miṭā saktā hai. Wuh mujhe jannat meñ dāḡhil hone ke lāyq banā saktā hai. Hāñ, wuh merī zindagī tabdīl kar saktā hai.

Jin Sāmariyon̄ se us kā pālā paṛā thā unhoñ ne yih bāt mān lī thī. Sāmariyon̄ ne iqrār kiyā

thā, “Ham ne khud sun aur jān liyā hai ki wāqai duniyā kā najātdahindā yahī hai.”

Chalte chalte Īsā Masīh apne shāgirdon ke sāth Qānā pahunch gayā. Pichhli bār Qānā mein ek mojizā huā thā. Ek shādī par pānī mai mein badal gayā thā.

Is dafā shādī nahīn thī. Ek ādmī thā. Ek ādmī jo saḡht pareshān thā. Yih ādmī shāhī officer thā. Ain usī waqt us kā beṭā Kafarnahūm shahr mein saḡht bīmār paṛ gayā thā. Kafarnahūm taqrīban 30 kilometer dūr thā. Qānā pahārī par thā jabki Kafarnahūm kāfī nīche thā. Wuh jhīl ke kināre paṛā thā. Wahān jāne ke lie 500 meter utarnā paṛtā thā. Ek din mein pahunchnā mushkil hī thā.

Kachche Īmān kā Bīj

Jab is officer ko ittalā milī ki ustād Galīl pahunch gayā hai to wuh bhāgkar us ke pās āyā. Us ne thartharāte hue minnat kī, “Zarā mere ghar āen jo nīche Kafarnahūm mein hai tāki

mere beṭe ko shafā mile. Is waqt wuh marne ko hai.”

Ham kah sakte haiñ ki yih officer Masīh ke bāre meñ dūsre Galīliyoñ kī-sī soch rakhtā thā. Wuh siyāsī soch rakhtā thā. Lekin ab us kā beṭa marne ko thā. Jis tarah log madad ke lie pīr ke pās jāte haiñ usī tarah wuh ghabrāe hue Ḳhudāwand ke pās bhāg āyā. Jo īmān Īsā Masīh har ek meñ dekhñā chāhtā hai wuh us meñ kam thā. Kah leñ ki īmān kā bīj hī thā. Phir bhī bāp kā dil apne beṭe ke lie dhaṛak rahā thā. Jab beṭa marne ko hai to māñ-bāp use bachāne ke lie kyā kuchh nahīñ karte.

► *Īsā Masīh ne kyā jawāb diyā?*

Us ne ek ajīb-sā jawāb diyā. Kaī bār Īsā Masīh aise jawāb detā hai jin se hamen sadmā pahuñchtā hai. Us ne farmāyā, “Jab tak tum log ilāhī nishān aur mojize nahīñ dekhte īmān nahīñ lāte.”

► *Kyā? Yih kaisā jawāb hai? Aisī guzārish aur yih jawāb! Yih kyon?*

Plastic ke saste khilaune ko thoṛā istemāl karen to tūṭ jātā hai. Kyā officer kā imān bhī isī tarah tūṭ jāegā? Yā kyā imān ke bij se mazbūt paudhā ug āegā?

Lekin Īsā Masīh yih bāt na sirf shāhī officer balki sab sunane wālon se kar rahā thā. Īsā Masīh logon ko sachche imān kī taraf lānā chāhtā hai. Ki un kā imān siyāsī na rahe balki rūhānī ho jāe.

Imān ke Bij se Nāzuk Paudhā

Masīh kī bāt sunkar shāhī officer kā munh utar gayā. Apne betē kī wajah se wuh tarap rahā thā. Ghighiyāne lagā, “Ḳhudāwand āen to sahī, is se pahle ki merā laṛkā mar jāe.”

► *Officer ne Īsā Masīh ko kyā kahā?*

Ḳhudāwand.

Mān-bāp jab bachche ko kuchh ho jāe to apnī jān dene ko bhī taiyār ho jāte haiñ. Ab bāp ke

andar īmān ke chhoṭe bīj se nanhā-sā paudhā ug āyā. Isī lie us ne Ḳhudāwand kahā. Ab tak wuh apne hāth us kī taraf phailāe kharā hai. Ḳhudāwand kī taraf. Pakkā īmān to nahīn hai lekin ek nāzūk paudhā ug āyā hai. Kyā wuh aur mazbūt ho jāegā yā murjhā jāegā?

Īsā Masīh īmān baṛhāne kā māhir doctor hai. Hamārā īmān hameshā kamzor rahtā hai islie wuh mahārat se use mazbūt karne ke muḳhtalif tariqe istemāl kartā hai. Phir bhī wuh hameshā hamārā dukh-dard mahsūs kartā hai. Use officer par tars āyā. Us ne farmāyā, “Jā, terā beṭā zindā rahegā.”

Īmān kī Āzmāish

- *Kyā Īsā Masīh ne farmāyā ki chalo main sāth ātā hūn?*

Nahīn. Na sirf yih balki officer ko ek hukm bhī milā. Use karegā to beṭā zindā rahegā.

- *Wuh kyā thā?*

Jā. Mere baḡhair apne ghar jā.

► *Kyon?*

Wuh officer kâ imān āzmānā chāhtā thā. Āzmāte waqt naqlī imān ukhar jātā hai jabki sachchā imān aur mazbūt ho jātā hai.

► *Kyā officer yih sunkar zid karne lagā ki āp ke baḡhair main nahīn jāūngā?*

Nahīn, wuh chup-chāp chalā gayā. Dhyān den ki us kâ imān kis tarah barh gayā thā. Pahle Īsā Masīh ko sāth ānā thā. Ab wuh mān gayā ki yih bhī zarūrī nahīn. Kām ho jāegā. Wuh apne ghar chalā gayā.

Dopahar ek baj gae the jab wuh chalne lagā. Chalte chalte use rāste meñ kahīn rāt guzārñā parā. Agle din wuh abhī rāste meñ thā ki us ke naukar us se mile. Lekin yih kyā thā? Wuh khushī se nāch rahe the. Jab qarīb pahuñche to pukār uṭhe, “Āpkā beṭā zindā hai. Wuh ṭhīk ho gayā hai!”

Bāp hairānī se uchhal parā. Kyā sach?! Merā beṭā! Zindā! Merā lāḍlā! Merī āñkhoñ kâ tārā!

Us ne pūchhā, “Us kī tabīyat kab sañbhal gai?”
Naukar bole, “Buḡhār kal dopahar ek baje utar
gayā.”

Yih to kamāl hai! Ain us waqt jab Masīh ne kahā
thā ki terā beṭā zindā rahegā.

Īmān kā Phal

Ham dekh chuke haiñ ki aksar Galīliyon kā
Masīh par naqlī īmān thā. Wuh us se fāyda
uṭhānā chāhte the. Lekin wuh yih mānane ke
lie taiyār nahīn the ki wuh Ḳhudāwand hai. Ki
wuh duniyā ko najāt dene wālā hai.

Is ke muqābale mein shāhī officer ke īmān ko
dekho. Pahle wuh bhī itnā hī samajhtā thā ki
Īsā Masīh pīr jaisā hai jo mere beṭe ko shafā de
saktā hai. Īmān kā bīj. Phir Īsā Masīh ne use
challenge diyā ki tum sirf mojize dekhne āe ho.
Is bāt ne use Masīh se dūr na kiyā balki īmān ke
bīj se ek nāzuk paudhā ug āyā. Wuh zor-shor
karne lagā: Ḳhudāwand, āeñ to sahī, is se pahle
ki merā laṛkā mar jāe. Īsā Masīh ne us ke sāth

jāne se inkār kiyā phir bhī wuh māyūs na huā.
Us kā īmān aur mazbūt ho gayā.

Jab beṭe ko shafā milī to shāhī officer kā īmān
bilkul pakkā ho chukā thā. Īsā Masīh na sirf us
kā pīr ban gayā jo us kī madad kar sake. Wuh us
kā Ḳhudāwand ban gayā. Wuh najāt dene wālā
jo is lāyq hai ki main apnī pūrī zindagī use waqf
karūn.

Shāhī officer kā īmān dekhkar us ke tamām
ghar wāle bhī īmān lāe.

► *Rahā ek sawāl: Āpkā īmān kaisā hai?*

Injīl, Yūhannā 4:43-54

Wahān do dīn guzārne ke bād Īsā Galīl ko
chalā gayā. Us ne ḳhud gawāhī dekar kahā
thā ki nabī kī us ke apne watan meñ izzat
nahīn hotī. Ab jab wuh Galīl pahuñchā
to maqāmī logoñ ne use ḳhushāmdīd kahā,
kyoñki wuh Fasah kī Īd manāne ke lie
Yarūshalam āe the aur unhoñ ne sab kuchh
dekhā jo Īsā ne wahān kiyā thā.

Phir wuh dubārā Qānā meñ āyā jahān us ne pānī ko mai meñ badal diyā thā. Us ilāqe meñ ek shāhī officer thā jis kā beṭā Kafarnahūm meñ bīmār paṛā thā. Jab use ittalā milī ki Īsā Yahūdiyā se Galīl pahuñch gayā hai to wuh us ke pās gayā aur guzārish kī, “Qānā se mere pās utar āeñ aur mere beṭe ko shafā deñ. Kyonki wuh marne ko hai.” Īsā ne us se kahā, “Jab tak tum log ilāhī nishān aur mojize nahīn dekhte imān nahīn lāte.”

Shāhī officer ne kahā, “Ḳhudāwand āeñ, is se pahle ki merā laṛkā mar jāe.”

Īsā ne jawāb diyā, “Jā, terā beṭā zindā rahegā.”

Ādmī Īsā kī bāt par imān lāyā aur apne ghar chalā gayā. Wuh abhī utar rahā thā ki us ke naukar us se mile. Unhoñ ne use ittalā dī ki beṭā zindā hai.

Us ne un se pūchh-gachh kī ki us kī tabīyat kis waqt se behtar hone lagī thī. Unhoñ ne jawāb diyā, “Buḡhār kal dopahar ek baje utar gayā.” Phir bāp ne jān liyā ki usī waqt Īsā ne use batāyā thā, “Tumhārā beṭā zindā rahegā.” Aur wuh apne pūre gharāne samet us par īmān lāyā.

Yon Īsā ne apnā dūsrā ilāhī nishān us waqt dikhāyā jab wuh Yahūdiyā se Galīl meñ āyā thā.